

testationem, & hæ vel citatoria, vel deliberatoria vocantur. Citatoria dantur ad comparendum, dilatoria ad deliberandum, num ille, qui in judicium vocatus est, litem suscipere beat. Quædam autem conceduntur à litis contestatione usque ad sententiam, quæ probatoria dicuntur, quia dantur ad parandas, affrendasque probationes. Denique in tertia litis parte dilationes conceduntur ad audiendam sententiam, vel mandatum exequendum, quæ definitioræ nuncupantur.

§. V. Dilationum tempore judicis officium conquiescit. Et quia arbitrarias tribuere dilationes, actus est judicialis, idcirco concedendæ sunt à judice pro tribunali sedente, causaque cognita (1). In dilationibus, quæ à jure dantur, nulla causæ cognitione opus est.

(1) *Can. ult. c. 3. q. 3.*

TITULUS XIV.

De Sententia, & Re Judicata.

- I. Sententia quid?
- II. Ea vel definitiva, vel interloquutoria.
- III. Utriusque discrimen.
- IV. Sententia à competente judece,
- V. Et pro tribunali sedente.
- VI. Et in scripto ferenda est.
- VII. An à judice recitanda?
- VIII. Quo idiomate concepta esse debeat?
- IX. An noctu ferri possit?
- X. Juri, actisque, & probatis congruens, certaque esse debet.
- XI. Condemnatio in expensas, & fructuum restitutio.
- XII. Sententia quando transeat in rem judicatam?

- XIII. In quibus causis in rem judicatam nunquam transeat?
- XIV. Rei judicatæ executio.
- XV. Quis rem judicatam exequitur?
- XVI. Quibus in rebus, & quo ordine executio fiat?
- XVII. Executio in bonis mobilibus, & immobilibus.
- XVIII. Auctio, & distractio pignorum.
- XIX. Debitor quando in carcere detrudendus?
- XX. Cessio bonorum.
- XXI. Quemadmodum ea fiat, & in quo differat à justitio quinqueñii?
- XXII. Beneficium competitæ.

§. I.

Judicaria disceptatione absoluta, oritur *conclusio in causa* (1), & à judice ferenda sententia est. Definitur sententia judicis pronuntiatio super re à litigantibus proposita condemnationem, vel absolutionem continens, & controversiam definiens (2). Justiniani legibus cautum erat, ut judex sententiam non ferret, nisi primum juratus declarasset, se procul habuisse studia partium, atque una ante oculos habita justitia, & veritate, causam judicasse (3). Sed hodie hoc iuramentum emittunt judices, cum munus judicandi suscipiunt.

(1) Formula hæc à Decretalibus Pontificiis in forum civile defluxit c. 5. §. 3. de caus. possess. et prop., c. 9. de Fid. instrum.

(2) L. 1. ff. de Re judic. Multa de hac sententia definitione habes à Cujacio in Cod. tit. de Senten. et interloq. opp. t. 9. col. 996. ed. cit. recte, & sapienter animadversa, ubi etiam multæ sunt leges, quæ ad hunc locum pertinent, diligenter explicatæ. Vide etiam Donellum in L. 1. ff. de Re judic. opp. t. 11. col. 117. et seq. ed. cit., qui de illa Modestini definitione in dict. L. 1. accurate disputat, & Philippum Vicatum Vocabul. jur. verb. *Sententia*.

(3) L. 12. Cod. de Judic.

§. II. Sententia vel est interloquutoria, vel definitiva (1). Interloquutoria est, quæ non dirimit controversiam, de qua præcipue queritur, neque super ea fertur, sed super quæstione inter judicii cursum incidente (2). Interloquutoria dicitur, quia judex, dum de primaria causa queritur, interea loquitur, neque definitive pronuntiat, sed ea tantum dicit, quæ ad causam promovendam pertinent, ut judicium ad propositum finem perducatur (3). Definitiva autem est, quæ totum negotium definit, planeque dirimit controversiam.

(1) Jus civile sententia nomine propriæ definitivam intelligebat, mandata, jussa, aliaque decreta, quæ parabant quidem ad præcipuam causam definiendam viam, non tamen eam definiebant, interloquitiones dicebantur, nec vim habebant sententia neque in rem judicatam transibant L. 17. & 9. C. Ex quib.

caus. infam. tot. tit. cod. de Senten. & interloq. l. 2. ff. de Appellat. recip. Sed Jus canonicum promiscue hoc vocabulum usurpar, quod etiam in praxi receptum est, unde nata est vulgata distinctio inter sententiam interloquitoriam, & definitivam.

(2) Vox hæc *interloquio* juris auctoribus usitata est, eaque pluries in civilis, & canonici juris libris occurrit. Verum antiquiores *interloquitionem* vocarunt *præjudicium*; quoniam *interloquitorium* vix latine dici, & eleganter posse, Vossius de Vit. Serm. l. 3. c. 16. monet.

(3) Consule Donellum in tit. ff. de judic. & de Effect. sentent. & de Interloq. opp. t. 11. col. 115, et 116. ed. cit.

§. III. Magnum inter utramque sententiam discrimen est. Nam interloquitoria sententia ab eodem judece revocari potest (1), definitiva non potest (2), hæc in scriptis ferri debet, illa non scribitur; à definitiva appellatur, ab interloquitoria appellare non licet, nisi vim habeat definitivæ, aut magnum inferat detrimentum, quod alio modo removeri non possit (3).

(1) L. 14. ff. de Re judic., c. 60. de Appellat.

(2) L. 9. cod. de senten. & interloq., l. 55. ff. de Re judic.

(3) Jus civile ab interloquitoria appellationem negat l. 16. cod. de Judic., l. 36. c. de Appellat., quam legem restituit Cajacius Observ. l. 12. c. 3. opp. t. 3. col. 306. ed. Ven. 1758. Confer etiam l. 3. c. Theod. Quar. appell., & l. 65. c. Tacod. de Appellat. Erant tamen etiam apud Romanos interloquitiones vel *simplices*, quæ directo præcipuum causam non attingebant, sed quibus Judex vetabat, vel jubebat ea, quæ ad ordinem in judicio servandum pertinebant l. 14. ff. de Re judic., vel *vim sententie* habentes, quibus judex rem aliquam incidentem definiebat, quæ tamen præcipuum causam respiciebat, parabatque simul ad eam definiendam viam, qualis etiam sententiae nomine comprehendebatur l. 39. ff. de Minor., ubi hæc quæstio proponitur. Minores intra quadriennium in integrum restitutionem petierant. Dubitabatur, utrum minores essent, cum gestum est negotium, & ita ætatem demonstrare oportebat. Lata est pro ætate sententia, quæ quavis interloquitoria esset, vim tamen definitivæ habebat, cum causa cognita rem incidentem definire, ex qua judicium præcipue causæ pendebat, num danda esset restitutio? Ab hac sententia emissâ, & accepta appellatio est. Concedit etiam Jus civile appellationem ab interloquitoria, quæ insigne damnum affert, quod alio modo removeri non

potest l. 2. c. Si penden. appellat. l. 2. ff. de Appell. recip. l. 18. c. Theod. Quar. appell. non recip. Jus Canonicum à quavis isterloquitoria, & à quovis gravamine appellationem permettebat c. 11. et 12. de Appellat. et c. 1. cod. in 6. Sed Concilium Tridentinum sess. 13. c. 1. et sess. 24. c. 20. de Reform. jus hoc antiquavit, neque ab interloquitoria appellationem permisit, nisi ea vim habeat definitivæ, aut grave inserat detrimentum, quod alio modo tolli, avertique nequeat. Quæ etiam Juris civilis disciplina est.

§. IV. Ut definitiva sententia vim habeat, plura desiderat. Principio à competente judge, qui in litigantes, aut saltem in reum jurisdictionem habeat (1), eoque pro tribunali sedente, ac juris ordine servato (2) ferenda est. Tribunal erat locus sublimis, & editus, fere ad instar hemicycli introrsum curvatus, ad quem per gradus ascendebatur, & in quo magistratus jus redebat (3); ideo legum auctores sæpe magistratum designant iis verbis, qui tribunal præst, qui pro tribunali cognoscit (4). Cui loco à Latinis opponitur *locus planus* (5): uade de *plano cognoscere*, videlicet ex æquo loco cognoscere, non ex superiore, neque pro tribunali, sed in via, in transitu, cum vel lavandi, vel gestandi, vel ludorum gratia magistratus prodierit (6).

(1) Cap. 4. de Judic. c. 3. de consuet.

(2) Cap. 19. de senten. et re jud. c. 1. seq. Ut lit. non contest.

(3) Vitruvius Architect. l. 5. c. 1. p. 168. ed. Galiani Neap. 1758. Item tribunal, inquit, ut in ea æde, hemicycli schematis, minore curvatura formatum. Ejus autem hemicycli in fronte est intervallum pedum XLVI. introrsus curvatura pedum XV., uti eos, qui apud magistratus starent, negotiantes in basilica, ne impedirent.“ Extrema hujus curvaturæ latera à Tacito Annal. l. 1. c. 75. s. 1. p. 132. ed. Amstelad. 1673. cornua appellantur. Prætor ex hoc tribunali in sella curuli jus reddebat. quo spectat Martialis Epigr. 98. l. 11. vers. 17. et 18. p. 655. ed. Lugd. Batav. 1670. Atque adeo proprium erat tribunal majorum Magistratum Romanorum, ut eo uti non possent Magistratus Municipiorum, quin etiam minores Magistratus Romanorum, veluti Tribuni plebis, & triumviri, qui tantum in subsellis jus dicere solebant. Hinc & municipales Magistratus peda-

nei judices à Paulo vocantur *l. 38. §. Quis se ff. de Pxn.*

(4) *L. 2. §. pen. ff. de Judic., l. 2. ff. de Re judic.* Cuius jurisdiction non est, ejus nullum est tribunal. Consule Pollettum *Hist. for. Roman.* *l. 1. c. 6.*, & Brissonium *de Verb. significat. verb. Tribunal.*

(5) Paulus *Recept. senten.* *l. 5. c. 16. §. 14.* apud Schultingum *Jurisprud. vet. ante-justinian.* p. 495. ed. Lipsiae 1637. "Custodiae, inquit, non solum pro tribunali, sed & de plano audi, possunt, atque damnari." Locum planum locum aequum appellat Cicero, & eum loco superiori, hoc est tribunali opponit *Ep. ad familiar.* *l. 3. Ep. 8. opp. t. 7. p. 79.* ed. Oliveti Genevae 1746. Confer Gerardum Noodtum *de Jurisdict. et imper.* *l. 1. c. 10.* Hinc edictalis formula, quo edicta proponi jubebantur *apud forum palam, unde de plano recte legi possint.* Ita enim illam in tabula ænea Bibliothecæ Regiae repeatit Gujaci Observ. *l. 7. c. 30. opp. t. 3. col. 170.* ed. cit.

(6) *L. 7. ff. de Manum. vind.*, *l. 1. ff. de constit. Princip.*, *l. 9. §. de Plano ff. de Offic. Procons.*, *l. 6. ff. de Accusat.* *§. Servi vero Inst. de Libertin.* Et hujusmodi quidem est planaria cognitione, cuius occurrit mentio in *l. 4. cod. de Dilat.*, licet in vulgatis editionibus mendose prorsus legatur plenaria. Qui de plano postulabant Magistratum per libellum adhibant, & Praetor per subscriptionem postulanti respondebat *l. 15. ff. de In ius vocan.*, *l. 29. ff. ad l. Cornet. de Fals.* Verum quæ decretum, causæque cogitationem requirebant, non per libellum, ac tantum pro tribunali expediti poterant *l. 9. §. Ubi decretum ff. de Offic. Procons.*, *l. 1. §. Suspecti ff. ad C. Turpil.* Ne quis tamen putet, Romanis idem fuisse de plano, et summatum cognoscere, animadvertisendum est, multa fuisse, quæ summatim, sed tamen pro tribunali expedire oportebat. Ita decretalis bonorum possessio ex Carboniano edicto, vel ejus exemplo data summaria erat *l. 3. de Carbonian. edit.*, & tamen alibi, quam pro tribunali dari non poterat *l. 3. ff. de Bon. posses.*, *l. 2. ff. Quis ordo in bon. possess. serv.*

§. V. Sedere judicem leges jubent, cum profert sententiam (1), sive ut suam ostendat auctoritatem, si ve quod mens acrius intendit, quo magis corpus quiescit (2). Sed nusquam Jure civili cautum est, ut sententia à non sedente judge pro lata irrita habeatur; id à solo Jure Canonico constitutum est (3). In judiciis sumariis nulla est sedendi necessitas (4). Sedere vero debet judge sententiam dicturus publice, non in secreto adeout, nulla sit vis sententiae, si in secreto dicatur (5).

(1) *L. 6. §. ult. cod. de Postulando, Novel. 71. c. 1.* Hinc sessiones judicum, quarum mentio est in *l. 2. §. 1. ff. Quis ord. in possess.* Consule Polletum *l. c. lib. 1. c. 5.*

(2) Hinc Tranio apud Plautum in *Mostell. act. 5. sc. 1. vers. 54. t. 1. p. 551.* ed. Lugd. Batav. 1669.

Nimio plus sapio sedens.

(3) *Cap. 5. de Senten. et Re judic. in 6.*

(4) *Clement. 2. de Verb. signific.*

(5) *L. 6. cod. de Senten. et interloq.*

§. VI. Deinde vero sententia ferenda est in scripto, & quæ sine scripto lata est, ne nomen quidem sententiae meretur (1). Nam sæpe verba ori pronunciata menti illudunt, non item ea, quæ litteris consignata sunt; periculoso est autem in proferenda sententia judicem labi, quoniam sententiam semel latam mutare, aut emendare non potest. Hinc judge diligentius primum de negotio deliberatione, & consultatione habita sententiam concipit, conceptamque in libellum, sive brevem chartam referre debet (2). Sed in causis brevioribus, & maxime vilium personarum necessaria non est scriptura (3), quæ etiam omittitur in interloquitionibus, quas judici ore proferre licet, inde vero notarius scripto mandat.

(1) *L. 3. cod. de Senten. ex peric. recit., can. 7. caus. 2. qu. 1. c. 5. de Senten. et re judic. in 6.*

(2) *L. 2. cod. de Senten. ex peric. recit.*

(3) *Auth. nisi breves cod. eod., ubi etiam scriptura necessitate solvit sententia Episcopi, qui inter suos subditos causas cognoscit, quod retulit Gratianus in decretum suum can. 45. c. 11. qu. 1.* Quod autem de Episcopo, idem etiam de capitulo sede vacante sanctum est in *c. 43. de testib.* Sed hodie etiam Episcopi inter suos subditos judicantis sententia in scripto ferenda est. Cujacius *ad c. 43. de Testib.* *opp. t. 6. col. 853.* ed. cit. ideo tum Episcopo, tum vacante sede Capitulo definitivam sententiam ex non scripto ferre licet arbitratur, quot sint illustres judices, qui ejus solemnitatis necessitate soluti sunt in *l. 2. cod. de senten. ex peric. recit.* Verum in ea

lege id tantum illustribus judicibus datur, ut "etiam per officium suum, & eos, qui ministerium suum eis accommodant, sententias definitivas recitent" ex tabella cum alii debeant eas suo ipsi ore "scriptas ex libello partibus legere; " quod generatim Canonico quoque jure de Episcopo constitutum est "propter dignitatis prærogativam, " ut inquit Bonifacius VIII. in cit. c. 5. de sentent. & re iud. in 6. Ego id jure singulari de Episcopo sanctum arbitror, ut cum causam cognosceret inter clericos, scripturæ solemnitatem servare non cogeretur. Simile jus singulare de Præfecto Prætorio, qui verbo sententiam dicebat, constitutum fuisse, scribit Cassiodorus Var. l. 6. n. 3. seu Formul. Præfct. Præt. p. 97. ed. Rotomag. 1679. sed ceteri illustres judices, de quibus simile jus editum non fuerat, definitivas sententias scripto mandare debebant, neque certe laudata lex 2. eos hac necessitate solvit.

§. VII. Collata in libellum sententia ab ipso judice recitanda est, & vero præsentibus, aut saltem in eam rem vocatis litigantibus (1). Tantum Præfectis Prætorio, ceterisque illustribus magistratibus Juri Civili concessum est, ut per ministros suos sententias ex tabella recitent (2); & exemplo illustrium magistratum Bonifacius VIII sancivit, ut etiam Episcopi sententias suas per alios proferant (3). Sed jam ubique receptum est, ut judicium sententiae per alios recitentur (4); imo apud nos à nemine sententia legitur, sed eam latam & publicatam notarius peculiari libro scribit, eaque tunc incipit vim suam exserere.

(1) L. 2. cod. de Senten. ex peric. recitan. c. ult. de Senten. & Re iud. in 6. Sententiam ex tabella, seu ex scripto pronuntiare in jure civili dicitur ex periculo recitare; unde titulus Codicis de Sententiis ex periculo recitandis. Extat hic idem titulus in Codice Theodosiano l. 4. tit. 17. De illo autem verbo periculi, ex quo sententia recitantur, multæ sunt, interque se discrepantes doctrinæ hominum opiniones. Plures sunt, qui utrumque locum in Codice Theodosiano, & Justiniane corruptum putant, ac legendum contendunt de Sententiis ex breviculo recitandis, atque ita sentiunt Alciatus Dispunct. 20. Perrenon. Animadvers. 2. 17., Ferrandus Adduensis Expl. l. 2. apud Everardum Ottoneum Thes. jur. civ. tit. 2. p. 575., aliisque, atque hæc etiam lectio probabilis videatur Donello de Jur. civil. l. 28. c. 3. n. 10. opp. t. 6. col. 403. cit. ed. Lucæ. Sed vera lectio est ex periculo, quam solide tinentur Sir-

mondus Antirreth. 2. c. 11., Desiderius Heraldus Obsrvo. c. 50. et Animadvers. ad jus Attic. 2. 7. 4., Grotius in Flor. spars. ad cod. Justinian. 7. 34., Cujacius Obsrvo. l. 5. c. 25. opp. t. 3. col. 121. et in cod. de Senten. ex peric. recitan. t. 9. col. 995. ed. cit. De hujus autem vocabuli interpretatione magnum est sententiarum divertitum. Mitto quorundam explanationes plane ridiculas, & mitto illos, qui recitare ex periculo interpretantur recitare ex memoria, cum revera sit recitare ex scripto, uti titulum illum in utroque codice legenti facile patebit. Fere inter omnes constat, periculum esse libellum ex quo sententia recitat; sed male hujus nominis causam reddunt, quia scilicet ex sententia semper aliquis periculum subeat, aut reus, aut judex si male judicavit, quæ etiam Cujacii sententia est. Ego assentior Jacobo Gothofredo in l. 2. cod. Theod. de Senten. ex peric. recitan. t. 1. p. 435. ed. Lipsie cit., qui periculum interpretatur experimentum, & tentamen, quemadmodum periculum facere nihil est aliud, quam rem anteā tentare, ne quid per errorem fiat. Est igitur periculum tabella, seu libellus, in quo judex scribit quod sentit, ac sedulo legens, atque relegens, quæ scripto mandavit, cuncta emendat, quæ emendanda putat, ut in hisce scripturis fieri solet, denique conficit sententiam, quam recitare debet. Uno verbo quod à nobis minuta, id in Codicibus Theodosiano, & Justiniane periculum appellatur.

(2) L. 2. cod. de Senten. ex peric. recitan.

(3) Cap. ult. de Senten. et re iud. in 6.

(4) Consule Gudelinum de Jur. novis. l. 4. c. 12.

§. VIII. Quod attinet ad idioma, quo sententiam concipere oportet, id jure Romano tantum Latinum erat, quod in ferendis sententiis, atque in publicis actibus adhibebatur (1). Quod quidem jus non in urbe solum, sed etiam in provinciis; licet alio sermone uteatur populus, obtinuisse videtur (2). Sed Arcadii, & Honori lege sancitum est, ut magistratus provinciarum tam latina, quam græca lingua sententias proferre possint (3). Ecclesia semper usa videtur græco, aut latino sermone, qualem videlicet populi usus postulabat; quin etiam postequam sermo latinus popularis esse desiit, eum in dicendis sententiis Occidentalis Ecclesia retinuit. Nunc etiam forum sœculare multis in locis latina lingua, barbara tamen, & incondita utitur.

(1) L. 48. ff. de Re iudic.

(2) S. Augustinus de Civit. Dei l. 19. c. 7. opp. t. 7. col. 551. cit. ed. Ven.

(3) L. 12. cod. de Sentent. et interloq. Quam legem quidam pugnare existimant cum dict. l. 48., sed revera nulla inter utramque pugna est.

§. IX. Noctu quoque judicia exerceri, aut sententias ferri vetant leges Romanorum (1), quod jus profluit à legibus XII. Tabularum (2). Nam quidquid judex agit, non in tenebris, sed palam, atque in omnium luce agere debet. A Jure Civili Canonicum non ablutit (3); sed tamen exempla non desunt judiciorum, quæ noctu gesta vim, & exitum habuerunt (4). Certo etiam in loco, in quo jus dici solet, sententia ferenda est (5); sed his in rebus spectare decet locorum consuetudinem; & jam plerisque in locis subtiliores hæ solemnitates fori usu sublatæ sunt.

(1) L. 1. §. 8. ff. Quand. appell., Novel. 82. c. 3. Consule Petrum Fabrum Semestr. l. 2. c. 9.

(2) A. Gellius Noct. Attic. l. 17. c. 2. p. 923. ed. Lugd. Batav. 1666., Seneca de Ira l. 3. c. 18. et 19. p. 124. et 126. ed. Amstelæd. 1672. Confer Rævardum ad l. 12. Tabul. c. 7. p. 14. ed. Neap. 1779., & Scipionem Gentilem de Jurisdic. l. 2. c. 29. opp. t. 3. p. 221. ed. Neap. 1764.

(3) Cap. 24. de Offic. et potest. deleg.

(4) Svetonius in Augusto c. 33. p. 233. t. 1. ed. Pitisci Leovardie 1714. Areopagitas noctu judicasse constat, & multa sunt exempla judiciorum noctu gestorum aut ex consensu litigantium, aut ex locorum consuetudine.

(5) L. penult. ff. de Just. et jur., l. 6. cod. de Senten. et interloq., ibique Glossa.

§. X. Porro sententia debet esse cum Jure consentiens, actisque, & probatis congruens (1), ut si juri expresso repugnet, nulla sit (2); si vero litigantis juri aduersetur, valet quidem, etsi iniqua sit, sed per appellationem suspenditur, novoque judicio revocatur (3). Debet etiam esse certa, & quæ definite absolvat, aut condemnnet; quamquam necesse non sit in ea decidendi rationes enarrare, nisi id gravis causa postulet (4); postremo controversiam per omnes ejus partes expedire debet. Hinc non tantum super præcipuo negotio ferenda est, sed etiam super iis, quæ negotio accedunt,

cum eoque sunt connexa, & conjuncta, uti sunt expensæ litis, & fructus percepti; dedecet enim, absoluto juditio, litem alteram ex prima litis materia exoriri (5).

(1) Si aliud ex actis constet, & aliud judicii ex privata conscientia exploratum sit, multi putant, judicem non secundum acta, & probata, sed secundum conscientiam judicare oportere. Verum hæc sententia longiore faciet judicii cursum, & graviori sumptu utrumque litigantem afficit, neutri tamen proderit. Nemo enim judicii extra acta credere cogitur, illaque statim novo judicio secundum acta revocabitur. Tutijs esset judicem sese prorsus ab eo judicio abstinere, causamque deferre ad judicem superiorem, vel de componendo negotio laborare. Quod si nihil horum facere judex possit, & omnino sententiam ferre cogatur, eum "non secundum, id quod ipse novit tamquam privata persona, sed secundum id, quod sibi innotescit tamquam personæ publicæ, " hoc est secundum acta, & probata judicare debere tradit S. Thomas 2. 2. qu. 67. art. 2. Ex iis tamen, quæ judex privatim novit, "adjuvari potest, pergit, ipse Thomas, ut districtus discutiat probationes inductas, ut possit earum defectum investigare. Quod si eas non possit de jure repellere, debet eas in judicando sequi. " Late ea de re disputat Corruvias Var. resol. l. 1. c. 1.

(2) L. 19. ff. de Appellat., c. 1. de Sentent. et re jud., c. 64. de Regul. jur. in 6.

(3) L. 2. cod. Quand. provoc. non est neces., c. 5. et 6. de In integr. restit., c. 13. et 21. de Senten. et re jud.

(4) Cap. 16. et 18. de Senten. et re jud.

(5) L. 3. cod. de Fructib. et lit. expens.

§. XI. Et quia litem injuste videtur instituisse, qui causa cecidit, ubique victus in expensas victori condemnatur (1); præsertim si constet, eum temere, ac per calumniam litem intulisse (2). Fructus vero, quos victus cogiturn restituere, ii præcipue sunt, qui post litem contestatam fuere percepti, aut saltem percipi potuissent, quoniam, re in judicium deducta, statim in possessore mala fides oritur (3). Quin etiam si quis ante litem contestatam in dolo, malave fide versatus est, etiam fructus antea perceptos restituere debet.

(1) L. 5. cod. de Fructib. et lit. expens.

(2) Confer Donellum de Jur. l. 16. c. 3. n. 6. et seq. r. 6. col. 309. et seq. ed. cit.

(3) L. 2. cod. eod.

§. XII. Lata , & publicata sententia , nisi ab ea intra decem dies appellatum fuerit , vim acquirit rei judicatæ (1) , quæ finem controversiarum pronunciatione judicis accipit (2) . Nam qui intra legitimum tempus non provocavit , cum provocare posset , is in sententiam consensisse videtur . Proprie res judicata , non sententia , controversiæ finem imponit , quoniam hæc non ita rem expedit , ut totum negotium plane finitum habeatur . Res judicata actionem , & exceptionem parit (3) ; jus facit inter litigantes , quin & tertium obligat , si ex ejus consensu lis acta sit , aut is causam ab alterutra parte habeat (4) , veritatis habet loco (5) ; & quamquam postea nova prodierint monumenta , tamen lis per rem judicatam extincta , nonnisi ope restitutionis in integrum , redintegrari potest (6) .

(1) Cap. 13. & 15. de Sentent. & re jud.

(2) L. 1. ff. de Re jud.

(3) Cap. 13. de Senten. & re jud.

(4) Cap. 25. eod. c. 25. in fin. de Præben.

(5) L. 25. ff. de Stat. homin. Eleganter Cicero pro Sylla n. 22. t. 5. p. 383. ed. Genev. 1744. Status , inquit , reipublicæ maxime judicatis rebus continetur.

(6) L. 4. cod. de Re jud., c. 21. de Sentent. & re jud.

§. XIII. Multæ tamen causæ sunt , in quibus sententiæ vim nunquam obtinent rei judicatæ , quamquam appellatum non fuerit , eæque idcirco recte revocantur . Hujusmodi sunt causæ , in quibus agitur de vi matrimonii (1) ; item sententiæ latæ à judice excommunicato (2) , vel incompetente , aut competente quidem , sed contra jus expressum (3) , aut contra priorem rem judicatam (4) , aut neglecto juris ordine , aut ex falsis instrumentis , & testibus , à quibus judex deceptus est (5) , aut quæ legitime publicatæ non sunt (6) , aut quæ dictæ à judice pecunia corrupto (7) ; denique nunquam transeunt in rem judicatam sententiæ criminales , in quibus rei condemnati sunt , præsertim cum subjecti sunt poenæ , quæ restitutionem admittit (8) .

(1) Cap. 10. & 11. de Sentent. & re jud., c. 5. & 6. de Frigid. & malefic.

(2) Cap. 24. de Sentent. et re judic., c. 13. de Hæret.

(3) L. 1. §. 2. ff. Quæ senten. sine appellat. rescind.

(4) L. 1. cod. Quand. provocar. non est necess.

(5) L. 3. cod. Si ex fals. instrumen. , c. 22. de Sentent. et re jndic., c. 9. de Testib., c. 6. de Except.

(6) Cap. ult. de Sentent. et re judic. in 6.

(7) L. 7. cod. Quand. provocar. non est necess.

(8) Argum. l. 6. ff. de Appellat. Ceterum sententia nulla esse potest modis compluribus , quos late recenset Blasius Altimarus de Nullit. senten.

§. XIV. Rei judicatæ finis est executio , per quam ad exitum , actumque perducitur , quod re judicata definitum , & mandatum est (1) . Nam vana , & inanis es- set sententia , nisi exitum haberet ; qui finis est , quo referri omnem judiciariam disceptionem oportet . Hæc autem executio fit statim in actione reali , si res ipsa , quæ extat , tradi possit ; in actione personali dantur induciæ quatuor mensium , qui à die , quo edita , vel si provocatum fuerit , à die , quo confirmata sententia est , numerantur (2) . Sed judex præscriptum tempus vel producere , vel contrahere potest , uti rerum ratio postulare videbitur (3) . Nunc fori usu , & consuetudine receptum est , ut vel statim post emissam sententiam , vel post aliquot dies , vel etiam post longum tempus arbitrio judicis constitutum expediantur litteræ executoriales ; quarum vi apparitores , aliique inferiores ministri sententiam exequantur .

(1) Fit executio post rem judicatam ; quoniam judicij initium ab executione sumere non licet l. 58. ff. de Re jud., l. 1. cod. de Execut. re jud. Ac recte monet Cujacius in cod. tit. de Execut. rei jud. opp. t. 9. col. 1023. ed. cit. , esse contra jus , quod profitemur , illa instrumenta , per quæ debitor non adito judice , neque edita re judicata in carceres detрудi potest .

(2) L. 68. ff. de Rei vind., c. 5. de Sentent. et re jud., c. 26. de Offic. et potest. jud. delegat. Tempus hoc humanitatis gratia , ut ait Papinianus in l. 16. in fin. ff. de Compensat. , debitori à lege conceditur , ut tempus habeat conquirendæ pecunie , quam adversario persolvat . Et olim quidem ex jure XII. Tabularum tempus illud erat triginta dierum , qui in iisdem tabulis justi dies appellantur , quo eodem vocabulo utitur Cicero de legibus l. 2. §. 9. opp. t. 3. p. 198. ed. Oliveti Genev. 1743. Praeter Idæ

muriis, inquit, famulos, eosque justis diebus, ne quis stipem cogio; hoc est diebus certis, quibus s. stipem cogere. Illud vero triconta dierum spatium, quod datur, ut judicato satisfiat, modicum tempus dicitur in l. 84. §. In pecunia ff. de leg. 1., & in l. 1. ff. de Itin. actuq. Itaque ex lege XII. Tabularum recte dici poterat modicum tempus, quo judicato satisficeret; sed immodicum factum est ex constitutione Justiniani, qui illud ad menses quatuor prorogavit.

(3) L. 2. ff. de Re judic., c. 15. de Sentent. et re judic.

§. XV. Jamvero sententiam exequitur ipse judex, qui eam dixit, modo jurisdictionem habeat; quoniam per executionem quis ad parendum sententiæ cogitur, nemo autem aliquem cogere sine jurisdictione potest. Hiac judex ordinarius, atque judex à Summo Pontifice, aut à Principe delegatus, quod plenam habent jurisdictionem, sententiam ipsi suam exequuntur (1); eodemque jure potitur judex, cui à magistratu jurisdictione mandata est (2). Quin delegati à Summo Pontifice, ut facilius sententiam exequantur, acceptam potestatem, & jurisdictionem per annum retinent (3). Verum datus judex, & arbiter, quorum tantum propria est rei cognitio, sententiam non exequuntur, sed ejus executio pertinet ad magistratum (4), unde jus cognoscendi profectum est.

(1) Cap. 7. et 11. de Offic. et potest. delegat.

(2) L. 5. ff. de Offic. ejus cui mand. est jurisdict.

(3) Cap. 7. et 26. de Offic. et potest. delegat.

(4) L. 15. ff. de Re jud., c. 4. de For. competen.

§. XVI. Cum autem fit executio, certus est observandus ordo, quem Jus constituit. Nimirum si res ipsa extat, quæ restitui debet, ea, vi quoque, ubi opus fuerit, adhibita, auferenda est (1); si nulla ea sit, aut propter pecuniæ debitum facienda sit executio, primum capienda sunt bona mobilia, deinde immobilia, postremo, si illa non extent, vel satis non sint, jura, & nomina debitorum, semper tamen pro modo debiti, creditori addicenda sunt (2). Tantum speciali jure cautum est, ut non nisi in subsidium executio fiat in sti-

pendia, arma, & equos militum (3); itemque ut instrumenta ad agriculturam necessaria executioni non subjiciantur (4).

(1) L. 68. ff. de Rei vind.

(2) L. 15. ff. de Re jud. Sed nunc fori usu receptum est, ut creditor indiscriminatim tum mobilia, tum immobilia capiat debitoris bona, praesertim cum creditum hypothecarium est.

(3) L. 4. cod. de Execut. rei jud.

(4) L. 7. cod. Quæ res pignor. oblig. pos. Ad similitudinem autem instrumentorum, quæ ad agriculturam sunt necessaria, etiam instrumenta artis, quam quis exercet, executioni non subsunt. Similiter executio non fit in vestes, quibus quis indutus est.

§. XVII. Cum executio pertinet ad bona mobilia, ea perficitur ab apparitoribus, qui se in locum conferunt, ubi sunt bona, quorum partem capiunt, eamque inferunt in locum publicum, ubi servanda est, donec auctione constituta vendatur aut à debitore recuperetur. Quod si bona hæc ad publicum locum deferri commode nequeant, ubi sunt, retinentur; sed clauso, obsignatoque ostio, & edicto proposito, ne quis ostium effringat, locumque ingrediatur (1). Verum cum executio de bonis immobilibus est, in ea perficienda, præter apparitores, aut nuncium, sive cursorem, etiam notarius adhibetur, qui factæ executionis publicum testimoniūm perhibet.

(1) A pragmaticis pagina illa superimposita transverso ligno, quæ foras occludit, & qua cautum est, ne quis eas reseret, *biffa* appellatur.

§. XVIII. Peracta executione pignus distrahitur; nisi quod interim debitor impedimentum inferat, cuius gratia ea pignoris venditio expediri non possit. Pignora autem distrahuntur in foro, hasta posita (1); non quidem statim, sed post certum temporis intervallum, quod Jure Civili complectitur duos menses, postquam pignora capta sunt (2). Verum fori mos est, ut decreto judicis, quod rogante creditore emittitur, intra dies decem hastæ subjiciantur, veneantque bona mobilia, at

Tom. III.

S

in bonis immobilibus primum instat creditor, ut hasta ponatur, tum proponuntur edicta, quibus licitatores ad auctionem vocantur; postremo exhibitis, apertisque chirographis auctionariis singulorum, rogatu creditoris, bona intra mensem largiori oblatori adjudicantur; eoque elapso adhuc debitor habet mensem unum, quo pignus luat, hoc est recuperet bona, pretiumque restituat, quod ab emptore solutum est. Cum nemo ad hastam accessit auctionem facturus, tertio minoris, quam aestimata sunt, bona creditori addicuntur (3).

(1) Hastam hanc *dominam* Juvenalis *Sat.* 3. *vers.* 33. *p.* 61. *ed.* *Lugdun.* *Batav.* 1664. vocat, quia scilicet hastæ potestati, & imperio omnia in venditione subjiciuntur.

Et præbere caput domina venale sub hasta.

Propertius autem *l. 4. Eleg. 1. vers. 139. p. 570. ed. Patavii 1710.* eamdem hastam tristem perticam appellant

Abstulit exultas pertica tristis opes.

Confer Brisonium *de Formulis l. 6. c. 59. p. 486. ed. Hale 1731.*, & Heineccium *Antiq. Roman. l. 2. tit. 1. §. 25. & tit. 18. & 19. §. 11. opp. t. 3. p. 242. & 296. ed. Neap.* 1769. Extat etiam *de Fide et jure hastæ fiscalis egregia dissertatio Cl. V. Januarii Franconii Archiepiscopi Consentiae edita Romæ an. 1767.*

(2) *L. 1. ff. de Re judic. l. 1. cod. Theod. de Distrah. pign. Consule Cujacium in cod. tit. de Execut. rei judic. opp. t. 9. col. 1023. seq. ed. cit., & Donellum *de Jur. civil. l. 23. c. 13. et 14. opp. t. 6. col. 141. et seq. ed. Lucæ cit.**

(3) Confer quæ scripsi in libro *de Notissimis in jure legibus l. 2. p. 190. ed. Romæ 1766.*

§. XIX. Extremum denique, cum desunt cetera, contra eos, qui rei judicatæ executionem ferre debent, remedium est, ut in carceres detrudantur. Tantum autem custodiæ causa detrusus in carceribus retinetur, donec judicato satisficerit (1). Mulieres jure novissimo Justiniani propter civile negotium in carceres conjici nequeunt, ut faciant judicato satis (2); eodem jure à Decretalibus donati sunt clerici (3), & huc

etiam spectant certa quibusdam in pluribus locis concessa privilegia, quæ non eadem ubique sunt.

(1) *Lege XII. Tabularum*, sicuti narrat A. Gellius *Noct. attic. l. 20. c. 1. p. 1101. ed. Lngduni Batav.* 1666., nisi debitor intra triginta dies post editum judicatum creditori satisfecisset, ei in servitatem addicebatur. Jus hoc vel aliis legibus, vel tacito populi consensu abrogatum jam erat, cum Diocletianus, & Maximianus tulerint *l. 12. cod. de Obligat. et action.*, qua scriptum est: *ob æs alienum servire liberos creditoribus jura compelli non patiuntur.* Quidam sunt, qui hac lege sanctum putant, ut debitores propter pecunia debitum in carceres detrudi nequeant, atque hanc eamdem esse ajunt Juris Canonici sententiam in *c. 2. de Pignor.* Sed errant vehementer. Nam lex illa Diocletiani, & Maximiani hoc tantum constituit, ut liberi creditoribus servire non cogantur, secundum jus ea ætate receptum, nihil vero habet de conjiciendis in carceres debtoribus. Quin eos, nisi bonorum cessionem emitterent, in carceres esse conjiciendos, edixit Alexander in *l. 1. cod. Qui bon. ceder. poss.* A jure civili nulla in re discrepat Jus Canonicum, quod in *cit. c. 2. expresse menorat*, atque confirmat civilem legem his verbis: “*Lex habet, ut homo liber pro debito non teneatur; si res defuerint, quæ possint pro debito addici.*” *Jus hoc expressit S. Gregorius M. l. 4. Ep. 45. ad Fantin. opp. t. 2. ed. Maurin. Paris.* 1705., unde forte desumptum est *c. 2.*, licet Gregorio III. vulgo tribuatur.

(2) *Novell. 134. c. 9.*

(3) *Cap. Odoardus de Solut.*

§. XX. Ad effugiendam tamen carceris injuriam, præsto est debtoribus miserabile beneficium inductum à L. Julia, per quam sua omnia bona cedunt creditoribus, ut ea vendant, eorumque pretium obtineant (1); atque ita illi à carceris molestia, & squalore liberantur (2). Quod beneficium iis tantum conceditur, qui propter casus adversos in egestate sunt; non decotitoribus, neque iis, qui patrimonium suum cum fraude effuderunt, quique cum creditoribus dolo sunt usi, cum scirent, sese solvendo non esse (3). Hoc autem efficit cessio bonorum, ut debitor in carceres non conjiciatur, sed à debito liber, & solitus non evadit, si cessis bonis satisfieri nequeat creditoribus; & ideo si deinceps alia bona adipiscatur, æs alienum dissolve-

re debet, modo ipse non careat quotidianis alimentis (4).

(1) Bona ipsa à creditoribus retineri non posse, sed ea esse vendenda, ut pretium secundum antiquorem, & potiorem, quem unusquisque obtinet, locum singulis tribuatur, præter ceteros, docet Voetus ad Pandect. l. 42. tit. 3. n. 8.

(2) L. 4. cod. Qui bon. ceder. poss.

(3) Consule Hilligerum in Donellum ad l. 16. et 17. ff. de Re judic. not. 18. col. 261. t. 11. ed. cit.

(4) L. 6. ff. de cession. honor.

§. XXI. Cessio bonorum ex Theodosii constitutione sola voluntatis professione, & nuda voce peragitur (1); sed in locis compluribus solemniter impetranda est (2), in eaque emitenda contumeliosi quidam ritus adhibentur (3). Differt à cessione bonorum dilatio, seu justitium quinquennii, quod tantum Principis beneficio, non à jure scripto conceditur. Dat Princeps hanc dilationem, cum plerique creditores consentiunt (4), quique eam impetravit, amplius post quinquennium bona cedere non potest (5). Imo ne quis Principis beneficio abutatur, dilatio non conceditur, nisi quis caveat, sese, exactis quinquenii induciis, creditoribus satisfacturum (6).

(1) L. 6. cod. Qui bon. ceder. poss.

(2) Confer Voetum in Pandect. l. 42. tit. 3. n. 6.

(3) Verum cessionem bonorum infamiam non irrogare, statutum est ab Alexandro Imp. in l. 11. cod. Ex quib. caus. infam. irrog., quod & innuit Justinianus l. ult. cod. Qui bon. ceder. pos. Confer Contium lect. subsecv. l. 2. c. 18. p. 34. ed. Neap. 1725, & Hilligerum ad Donellum in l. 16. et 17. tit. ff. de Re judic. opp. t. 11. not. 22. col. 265. ed. cit.

(4) Major pars creditorum non ex personarum numero, sed ex debiti quantitate estimatur l. ult. cod. Qui bon. ceder. poss.

(5) Consule Cujacium in cod. l. 7. tit. 71. opp. t. 9. col. 1058, ed. cit.

(6) L. 4. cod. de Precib. Imper. offeren.

§. XXII. Sunt nonnulli, qui bonorum cessione non indigent, ut à carceribus liberentur, quoniam habent

beneficium competentiæ, ut vocant, quod in eo positum est, ut id tantum, quod facere possunt, præstare cogantur. Eo beneficio à jure civili donati sunt parentes, patroni, socius, maritus ad dotis restitutio- nem ab uxore, donator à donatario convertus (1), filii familiæ in jus vocati pro contractibus gestis, cum in patria potestate essent, si patris hereditatem non obtinuerunt (2). Idem hoc beneficium jure canonico concessum est clericis (3), qui clericalibus induiti vestibus incedunt, ac tonsuram gerunt (4).

(1) §. 37. et seq. Inst. de Action.

(2) L. 2. ff. Quod cum eo qui in alien. potest., l. 49. ff. de Re judic., l. 3. §. 4. ff. de Minor. 25. an. Imo & filium, qui ex minima tantum parte patri heres exitit, eodem beneficio frui, scriptum est in cit. l. 2. ff. Quod cum eo qui alien. potest. Quæsitum autem est, quæ sit hæc minima pars, & multi quidem legitimam intelligunt. Sed ego assentior iis, qui hanc partem existimant, quæ minima est, si cum æris alieni mole comparetur.

(3) Cap. Odoardus 3. de Solut.

(4) Consule Fagnanum in cit. cap. 3. de Solut. n. 58., & consule etiam librum meum de Notissimis in jure legibus l. 2. p. 231. ed. Romæ 1766.

TITULUS XV.

De Appellationibus.

- I. Appellatio quid?
- II. Appellatio ab interloquutione, & à sententia definitiva.
- III. & IV. Utriusque discrimina.
- V. Quibus liceat appellare?
- VI. An appellare oporteat à sententia nulla?
- VII. Quæ cause appellationem rejicant?
- VIII. Fatalia tempora appellationis.
- IX. Quo tempore interponenda sit appellatio?
- X. & XI. Quo petendi, & acci-
- piendi apostoli?
- XII. Quo introducenda appellatio ad judicem superiorem?
- XIII. Quod prosequendæ, ac finiendæ appellationis tempus sit?
- XIV. Quid nostris moribus observandum?
- XV. Appellatio in devolutivo.
- XVI. & XVII. Quibus in causis tantum in devolutivo appellatio detur?
- XVIII. Nefas appellare ab eo, qui toti reipublicæ cum imperio præst.